

# Vain il curaschi premio cul premi solar?

Proget «S-chodamaint sün distanza» a S-chanf

**Sgürer l'andamaint dal egen affer pensand a lungia vista, uschè as pudess circumscriber la motivaziun da Simon Salzgeber da S-chanf in connex cun sieu s-chodamaint sün distanza.**

JON DUSCHLETTA

D'incuört ho la vschinauncha da S-chanf fat bun in sia radunanza cumünela ün contrat da servitut chi pussibiltescha a Simon Salzgeber da cuntinuer cul schlargiamaint dal s-chodamaint sün distanza. La decisiun dal suveraun da S-chanf es gnieu fat bun sainza cuntavuschs e conceda il dret da passagi cun lingias da furniziun tres ils quartiers Bügl Suot, Straglia Cadonau e Somvih. Cotres vain pussibilto a la ditta Salzgeber da cuntinuer cullas lavuors d'installaziun dal s-chodamaint sün distanza.

Scu cha Simon Salzgeber, marangun ed impressari da S-chanf, ho declaro, sun hoz tachos raduond 30 stabilimaints e chesas vi da la rait dal s-chodamaint. 14 da quels haun retrat fin cò chalur ecologica per lur s-chodamaints. Scha'ls böts da Salzgeber s'accumpleschan, lura stuves bastair la producziun d'energia regenerabla in ün stedi finel pel consüm d'almain 350 chesas d'üna famiglia. Quist pass dumanda però l'investiziun in üna seguonda pigna ed ün seguond filter electronic chi augmantaro la prestaziun dad hoz 900 kilowatts ura sün 2900 kilowatts ura. «Nus vulains cuntinuer cul plan pass per pass» disch Salzgeber. Tschinch milliuns francs ho'l investieu fin hoz, almain trais milliuns francs impü dess gnir a custair il proget finel. Ün proget curaschus, ma la situa-

ziun d'energia lascha in general penser positiv a Salzgeber. «Il futur dependa fermamaing dal svilup dal franc svizzer e dal svilup dal predsch dal öli». Intaunt cha'l franc pera d'esser suot controlla, restaro il predsch dal öli inavaunt ün factur melsgür ed explosiv.

## Nomino pel premi solar

Sper l'adöver da s-chart da lain - na scu ultim eir per as deliberer dal egen s-chart da la maranguneria - craja Salzgeber ferm vi da l'energia solara e sia importanza pel futur energetic. La halla da producziun da la maranguneria ho installo sül tet e sülla fatscheda vers süd implaunts solars termics in üna surfatscha da 609 m<sup>2</sup>. Quist implaunt solar vain sustgnieu da duos pumpas da chalur ed es tacho directamaing cul s-chodamaint sün distanza. Quist fat pussibiltescha üna gestiun alternanta da las duos tecnologias. La halla porta l'etiqueta d'energia «Plus Energie», vuol dir ch'ella produa dapü energia cu l'egen adöver. «La producziun annuela es trais voutas pü ota cu l'egen adöver» declera Salzgeber.

Scu cha Michèle Lötscher da la «Solar Agentur Schweiz» ho cunfermo invers la «Posta Ladina», es la ditta Salzgeber cun sieu implaunt d'energia regenerabla gnieu nomino pel «Premi solar svizzer 2012» illa sparta «Implaunts». La surdeda dal premi solar ho lö als 19 october a Spreitenbach.

Sper il proget da Simon Salzgeber sun gniesu nominos eir auncha trais oters progets da la regiun: Il fabricat nouv da la famiglia Andreas ed Uorschlina Beer a Zernez e la sanaziun energetica da la chesa Malloth Holzbau a San Murezzan illa sparta «Stabilimaints». Inavaunt illa sparta «Implaunts» es nomino eir la producziun da vapur per l'elavuraziun da lat da la Latteria Engiadinaisa a Bever.



Chod net ed agreabel our da zipplas da lain ed energia solara. Simon Salzgeber invia l'energia per la buna conscienzavers las chesas.

Fotografia: Jon Duschietta